


## “AS DIE HERE ROEP...” Gen. 12:1-9

Ons is besig met “Sendingweek” by die gemeente. Wanneer ons oor sending praat, maak ons meeste van die kere gebruik van tekste uit die Nuwe-Testament. Daar is egter ook soveel mooi en kosbare sendingstekste in die Ou-Testament. Hierdie week kyk ons na een van die mees bekende van hulle – “die roeping van Abram”. Lees die teksgedeelte rustig deur en dink saam oor die volgende vrae en besprekingspunte.

1. Vers 1: Wat dink jy het dit van Abram gevra om sy hele lewe<sup>1</sup> agter te laat en na ‘n onbekende land toe te trek? Gebeur sulke dinge vandag nog? Hoe sou jy reageer wanneer die Here dit van jou vra?
2. Vers 2-3: *Die Here gee aan Abram die opdrag om “van seën” te wees vir ander.* Hoe kan jy jou lewe so inrig dat jou hele lewe ‘n seën vir ander is? Wat sê Galasiërs 3:14 oor hierdie seën?
3. Wat was die eerste ding wat Abram gedoen het toe hulle in Kanaän aankom? Wat leer dit vir ons oor ons eie sending?
4. Het jy opgelet dat die Here nie in vers 1 al vir Abram gesê het wat die land se naam is wat Hy vir hom gaan gee nie? Eers in vers 7 maak die Here die naam en plek van die land aan Abram bekend. Wat sê dit vir jou oor gehoorsaamheid t.o.v. God se sending?

5. Ons wil so graag die resultaat van ons sending sien. Het Abram die voorreg gehad om self in die land Kanaän te woon? Wat sê dit vir ons oor ons sendingwerk?



Probeer iewers in die volgende week of twee die flik “The Mission” kyk. Dit is sekerlik een van die mees inspirerende films ooit as dit by sending kom.

Mag die Here jou stuur, om ‘n lewe van seën-vir-ander te leef!

- DJ Muller

### Die roeping van Abram

12 <sup>1</sup>Die Here het vir Abram gesê:

“Trek uit jou land uit, weg van jou mense en jou familie af na die land toe wat Ek vir jou sal aanwys.

<sup>2</sup>Ek sal jou ‘n groot nasie maak,

Ek sal jou seën en jou ‘n man van groot betekenis maak,

en jy moet tot ‘n seën wees.

<sup>3</sup>Ek sal seën wie jou seën,

en hom vervloek wat jou vervloek.

In jou sal al die volke van die aarde geseën wees.”

<sup>4</sup>Abram het toe weggetrek, gehoorsaam aan die woord van die Here, en Lot het saam met hom getrek. Abram was vyf en sewentig toe hy uit Haran weggetrek het. <sup>5</sup>Hy het sy vrou Sarai en sy broerskind Lot en al die besittings wat hulle bymekaargemaak het en al die slawe wat hulle in Haran aangeskaf het, saamgevat en hulle het weggetrek na Kanaän toe.

Nadat hulle in Kanaän aangekom het, <sup>6</sup>het Abram deur die land getrek tot by Sigem se aanbiddingsplek by die groot waarsêersboom. In daardie tyd het die Kanaäniete die land bewoon.

<sup>7</sup>Toe het die Here aan Abram verskyn en vir hom gesê: “Aan jou nageslag gee Ek hierdie land.”

Abram het daar ‘n altaar gebou vir die Here wat aan hom verskyn het.

<sup>8</sup>Van daar af het Abram verder getrek na die bergwêreld toe, oos van Bet-El, waar hy tent opgeslaan het met Bet-El aan die westekant en Ai aan die oostekant. Daar het hy ‘n altaar vir die Here gebou en die Naam van die Here aangeroep. <sup>9</sup>Toe het Abram kamp opgebreek en al gaande na die Suidland toe versit.

1983 Afrikaanse Vertaling

<sup>1</sup> Hou in gedagte dat die mense van daardie tyd se sekuriteit, rykdom en status alles in familieverband gefunksioneer het.

